

**Uunga siunnersuut: Tapersiissutitalimmik inissialiortiternermut
taarsigassarsititsisarneq pillugu Inatsisartut inatsisaat nr. xx, xx. xxx 2019-imeersoq**

(Ineqarnermut Attaveqarnermullu Naalakkersuisoq)

pillugu

Sanaartornermut Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Pele Broberg, Partii Naleraq

UKA 2019-imi ulloq 1. oktober 2019 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Naalakkersuisut inissianik sanaartornermut, pisinermut, iluarsaassinermut, alliliinermut pitsanngorsaaneermullu nutaanik taarsigassarsitsisarunnaarnissaat inatsisissatut siunnersuutikkut matumuunakkut siunnersuutigineqarpoq. Inatsisissatut siunnersuut taarsigassarsianik ingerlasunik, inissialiortiternermut tapersiissuteqartarneq pillugu inatsisaasimasut naapertorlugit taarsigassarsiaritinneqartunik aqutsinerup ingerlaannarnissaanut inatsisitigut sinaakkusiissaaq. Taamaaliornikkut piginnittut nikinneranni kiisalu taarsigassarsianik allannortitsinermi, nuussinermi, akilersuiunnaarallarnermi isumakkeerinninnermilu maanna taarsigassarsialinnut ikuunnissamat Naalakkersuisut periarfissaqalissapput.

Taarsigassarsianik ernialinnik siusinaarluni akiliisinnaanissamat kiisalu nammineerluni illulianut illunullu sanaqataaffiusunut taarsigassarsiat erniaqanngitsut akilersugassaanngitsullu nalikilliliiffiginissaanut piffissarititaasup sivikillineqarnissaanut periarfissiinissaq inatsisissatut siunnersuutikkut siunnersuutigineqarpoq.

2. Tusarniaanermut akissutit

Tusarniaanermut akissutit inatsisissatut siunnersuummut ilanngunneqarsimapput, tamannalu ilusiliinissamut Inatsisartut Siulittaasoqarfiannit piumasarineqartunut naapertuuppoq. Tamannali tusarniaanermut atortussat kalaallisuanut atuutinngitsaq ataatsimiititaliamit oqaatigineqassaaq. Ilusiliinissamut piumasaqaatit Inatsisartut Siulittaasoqarfiannit aalajangersarneqartut naapertorlugit tusarniaanermut akissutit danskisut kalaallisullu pigineqarnissaat aammalu inatsisissatut siunnersuummut, Inatsisartunit suliarineqartussanngorlugu tunniunneqartumut, ilanngunneqartussaammata ataatsimiititaliap Naalakkersuisunut eqqaasitsissutigissavaa.

Tusarniaaffigineqartut apeqqutaat oqaaseqaataallu tamarmiunngitsut Naalakkersuisunit isummerfigineqarsimasut ataatsimiititaliamit maluginiarneqarpoq. Tusarniaanerilli siunertaat tassarpiaavoq tusarniaaffigineqartut ataasiakkaat inatsisissatut siunnersuummut atatillugu maluginiagaasa Naalakkersuisunit isummerfigineqarnissaat. Tusarniaanermut akissutit ataasiakkaat oqaaseqarfiginissaannut Naalakkersuisut piffissamik atuinissaat ataatsimiititaliamit pingaartinneqarpoq.

3. Ineqarnermut Attaveqarnermullu Naalakkersuisup ilisimatitsiffiusumik ataatsimeeqatiginera

Immikkoortoq 140 aamma 141 pillugit Ineqarnermut Attaveqarnermullu Naalakkersuisumi ilisimatitsiffiusumik ulloq 11. oktober 2019-imi ataatsimiinnermi ataatsimiititaliaq peqataavoq, tassani inatsisissatut siunnersuummut sinaakkusiussat pingaarnerit saqqummiunneqarput.

4. Apeqqutit

Ataatsimiititaliap siunnersuummik suliarinninneranut atugassatut apeqqutit arlallit akissuteqarfigeqqullugit Ineqarnermut Attaveqarnermullu Naalakkersuisoq ataatsimiititaliamit qinnuigineqarpoq. Ataatsimiititaliap apeqqutaasa Naalakkersuisullu akissutaasa assilinerat isumaliutissiissummut matumunnga ilanngussaq 1-itut ilanngussaq 2-tullu ilanngunneqarput.

5. Ataatsimiititaliap siunnersuummik suliarinninnera

Siunnersuut siullermeerinninnermi partiinit tamangajannit taparserneqarpoq.

Sillimmasiisarfik illumi ikuallattoornissamut sillimmasiiffiusoq sallunaveequsiiffigineqarnissamut inatsisissatut siunnersuummi pisinnaatitaaffilerneqartoq ataatsimiititaliap maluginiarpaq. Inatsisitigut illersugaanissaq pissutigalugu sallunaveequsiiffigineqarnissamut pisinnaatitaaffiliineq aallaavittut isigalugu pisortanut oqartussanut taamaallaat tunniunneqartariaqarmat¹, sillimmasiisarfiit illumi ikuallattoornissamut sillimmasiiffiusut taamatut periarfissinneqarnerannut tunngavilersuutiminnik Naalakkersuisut inatsisissatut siunnersuutip aappassaaneerineqarneranut itisiliinissaat ataatsimiititaliamit kissaatigineqarpoq.

¹ <https://lovkvalitet.dk/lovkvalitetsvejledningen/3-retlige-graenser-og-almindelige-principper/3-2-almindelige-retsprincipper/3-2-4-udpantningsret>

Aningaasanut inatsimmi konto pingaarnermut 20.30.07-imi, ineqarnermut tapersiissuteqartarnermi ernianut akilersuutinullu ilanngaaseriikkanut tunngasumi, oqaasertaliussaq nr. 2-p inatsisissatut siunnersuummut nuunneqarnissaanik Naalakkersuisut aalajangererat ataatsimiititaliamit pitsaasutut isigineqarpoq. Taamatuttaaq ataatsimiititaliap allannguutigigitassatut kissaatigisai, UKA 2018-imi immikkoortoq 217-imut isumaliutissiissummi allaaserineqartut, Naalakkersuisut piviusunngortimmatigit ataatsimiititaliamit pitsaasutut isigineqarpoq.

5.1 Tusarniaanermut akissutit misissorneri

Tunisinermit atatillugu inissiamik pitsanngorsaarnermut akiliutit ”nerriviup ataaticut” akilerneqartalernissaat aarleqqutigineqarsinnaasoq INI A/S-ip oqaaseqaatimini eqqumaffigeqqaa. Taamaattumillu taamatut aarleqquteqarsinnaaneq inatsisissatut siunnersuutip aappassaaneerineqarneranut nassuiaatigeqqullugu Naalakkersuisut ataatsimiititaliamit kaammattorneqarput.

Piffissap nalikilliliiffiusussap ukiunit 33-nit 20-nut sivikillineqarneranut suut tunngaviunersut isumaliutigeqqullugu Aningaasaqarnermut Naalakkersuisoqarfiup Naalakkersuisunut kaammattuutigigaa ataatsimiititaliamit oqaatigineqassaaq. Isumaliutit taakku aappassaaneerinninnermi saqqummiunneqarnissaanik ataatsimiititaliap Naalakkersuisut kaammattorpai.

Kommuninut tunniussinnermi aningaasat inissialiornissamut immikkoortinneqartut siunertamut atorineqartassanersut pillugit SIK-p isumakulunnera ataatsimiititaliamit paasilluarneqarmat oqaatigineqassaaq.

5.2 Taarsigassarsianik aqutseriaaseq:

Ataatsimiititaliap inatsisissatut siunnersuummik suliarinninnermini Naalakkersuisunut apeqqutinik nassuissivoq, tassa piginnittut nikerinneranni akiliutissat aammalu immikkut ittumik akiliutissat taarsigassarsianik aqutseriaatsimit suliarineqarsinnaannginnerannik INI A/S-ip oqaaseqaatai Naalakkersuisunit isummerfigineqarsimannginnerat ataatsimiititaliamit paasineqarmat.

Taamatuttaaq taarsigassarsianut ernialersugaanngitsunut akilersugassaanngitsunullu piffissap nalikilliliiffiusartup allanngortinneqarnera nukissanik annertunerusumik atuiffiusasooq, taamaalillunilu taarsigassarsianik aqutseriaatsip ineriartortinneqarnissaa imaluunniit taarsigassarsiat taarsigassarsianik aqutseriaatsimi aqutsivigineqartut allanngortinneqartariaqarnerat naatsorsuutigineqartariaqartoq Aningaasaqarnermut Naalakkersuisoqarfimmit eqqumaffigeqquneqarpoq.

Aqutseriaatsimik allannguisinnaaneq aningaasaqarnikkut taamatullu allaffissornikkut kinguneqarsinnaammat tamatuma paasinarsisinnissaa ataatsimiititaliamit pingaaruteqartut

isigineqarpoq.

Piginnittut nikinneranni akiliutissat aammalu immikkut ittumik akiliutissat Namminersorlutik Oqartussat naatsorsuuserinermi aqutseriaasianit aqunneqareersut taarsigassarsianik aqutseriaaseq pillugu apeqqutinut akissutini nassiunneqartuni Naalakkersuisut paasissutissiissutigaa. Tamanna pillugu INI A/S-ip aammalu Aningaasaqarnermut Naalakkersuisoqarfiup tusarniaanermut akissummi oqaaseqaataannut akerliuvoq. Oqaatigineqartut taakku marluk taama annertutigisumik imminnut naapertuutinnginnerat ataatsimiititaliamit eqqarsarnartoqartinneqarpoq.

Piginnittut nikinneranni akiliutissat aammalu immikkut ittumik akiliutissat taarsigassarsianik aqutseriaatsimit aqunneqarsinnaanerat, taamaalillutillu aningaasartuuteqarnerunermik nassataqassannginnerat, aappassaaneerinninnermut akissuteqaamminni uppersaqqullugu Naalakkersuisut ataatsimiititaliamit kaammattorneqarput.

6. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassai siunnersuummut nalinginnaasumik nassuiaatini allaaserineqarput. Tassani allassimavoq inatsisissatut siunnersuut pisortanut aningaasaqarnikkut annertuumik kinguneqartussatut naatsorsuutigineqanngitsoq. INI A/S-imit aammalu Aningaasaqarnermut Naalakkersuisoqarfimmit apeqquserneqarmat, taarsigassarsianik aqutsinermik ingerlatseriaaseq isumagisinnaappagu Naalakkersuisut akissuteqaataat ataatsimiititaliamit akuersaarneqarsinnaavoq.

7. Ataatsimiititaliap inassuteqaatai

Ataatsimiititaliap isumaqatigiittup inatsisissatut siunnersuutip akuersissutigineqarnissaa inassutigaa.

Taama oqaaseqarluni isumaliutissiissummilu allassimasunik oqaaseqaateqarluni
ataatsimiititaliap siunnersuut aappassaaniigassanngortippaa.

Anders Olsen
Siulittaasoq

Aqqaluaq B. Egede
Siulittaasup tullia

Nikkulaat Jeremiassen

Justus Hansen

Pele Broberg